

Na osnovu člana 67. stav 3. i člana 68. stav 2. Zakona o organizaciji organa uprave u Federaciji Bosne i Hercegovine („Službene novine Federacije Bosne i Hercegovine“, broj: 35/05) i člana 3. Odluke o uvođenju metodologije za izradu Budžeta za građane u Zeničko-dobojskom kantonu („Službene novine Zeničko-dobojskog kantona“, broj: 4/16), Ministarstva finansija Zeničko-dobojskog kantona, d o n o s i

## **U P U T S T V O**

### **o načinu postupanja i rada kantonalnih organa uprave u postupku pripreme i izrade Budžeta za građane Zeničko-dobojskog kantona**

#### **Član 1.**

##### **(Predmet)**

(1) Ovim uputstvom uređuje se način postupanja i rada kantonalnih organa uprave, upravnih organizacija i službi Zeničko-dobojskog kantona (u daljem tekstu: kantonalni organi uprave), u postupku pripreme i izrade Budžeta za građane Zeničko-dobojskog kantona i međusobna saradnju kantonalnih organa uprave u realizaciji navedenih aktivnosti.

(2) Budžet za građane je dokument koji se izrađuje svake godine na osnovu konsultacija sa građanima i drugim subjektima u postupku izrade Budžeta Zeničko-dobojskog kantona.

#### **Član 2.**

##### **(Planiranje i provođenje konsultacija sa građanima i drugim subjektima)**

U postupku izrade Budžeta za građane kantonalni organi uprave, koji u svome budžetu imaju planirana sredstva za tekuće transfere i subvencije pojedincima, udruženjima građana, privrednim subjektima, te drugim nivoima vlasti ili imaju saradnju sa nevladinim organizacijama, obavezni su provesti konsultacije sa građanima i drugim subjektima, te obraditi i analizirati rezultate konsultacija.

#### **Član 3.**

##### **(Način provođenja konsultacija sa građanima i drugim subjektima)**

Kantonalni organi uprave iz člana 2. ovog uputstva, konsultacije sa građanima i drugim subjektima će provesti putem anketa pripremljenih za korisnike sredstava iz njihovog dijela budžeta i organizovanjem fokus grupa sa predstavnicima pojedinih korisnika, a na osnovu preliminarnih rezultata provedenih anketa.

#### **Član 4.**

##### **(Okvirna struktura ankete)**

U provođenju ispitivanja stavova građana i drugih subjekata u vezi sa budućim sadržajem Budžeta za građane, potrebno je imati u vidu:

- a) informacije o prihodima (utvrđivanje stavova o predstavljanju prihoda za koje su građani najzainteresovaniji),
- b) informacije o rashodima (utvrđivanje stavova o predstavljanju rashoda za koje su građani najzainteresovaniji),
- c) prioritete u raspodjeli i potrošnji (utvrđivanje najvažnijih budžetskih rashoda koje građani žele da budu predstavljeni u dokumentu Budžeta za građane),
- d) sektorske podatke i informacije o ciljanim programima (utvrđivanje najvažnijih funkcija, tj. sektora u okviru nadležnosti Kantona u okviru kojih građani žele da saznaju više o ciljanim programima, odnosno projektima).

## Član 5.

### (Dostava rezultata anketa i konsultacija)

Obrađene rezultate anketa i konsultacija, kantonalni organi uprave iz člana 2. ovog uputstva, dužni su dostaviti Ministarstvu finansija najkasnije do 30.11. tekuće budžetske godine radi izrade Budžeta za građane za narednu godinu.

## Član 6.

### (Izgled Budžeta za građane)

(1) U pogledu izgleda i sadržaja, svaki naredni Budžet za građane može sadržavati i eventualne dodatne elemente, u skladu sa rezultatima provedenih konsultacija sa građanima o informacijama za koje građani žele da budu sadržaj Budžeta za građane.

(2) Kreiranje Nacrta Budžeta za građane, pisanog jednostavnim i razumljivim jezikom za građane, sa adekvatnim ilustracijama, vrši se nakon utvrđivanja Nacrta Budžeta Zeničko-dobojskog kantona za narednu godinu, animiranjem građana za učešće u javnoj raspravi o Nacrtu Budžeta.

## Član 7.

### (Izrada konačnog dokumenta Budžeta za građane)

(1) Konačan dokument Budžeta za građane izrađuje se nakon donošenja Budžeta Zeničko-dobojskog kantona.

(2) Konačan dokument Budžeta za građane izrađuje Ministarstvo finansija Zeničko-dobojskog kantona, u skladu sa sredstvima planiranim za navedenu namjenu.

## Član 8.

### (Provođenje Uputstva)

Za provođenje ovog uputstva zadužuju se kantonalni organi uprave iz člana 2. ovog uputstva i Ministarstvo finansija Zeničko-dobojskog kantona.

## Član 9.

### (Objavljivanje Budžeta za građane i distribucija)

Objavljivanje Budžeta za građane vršit će se putem web stranice Zeničko-dobojskog kantona, štampanjem brošura i distribucijom brošura odgovarajućim korisnicima.

## Član 10.

### (Stupanje na snagu)

Ovo uputstvo stupa na snagu danom donošenja, a objavit će se u „Službenim novinama Zeničko-dobojskog kantona“ i na web stranici Vlade Zeničko-dobojskog kantona.

Broj: 07-14-6325-2-1/16  
Datum: 08.11.2016. godine  
Zenica

### Dostavljeno:

- 1x Svim organima uprave, upravnim organizacijama i službama.
- 1x Stručna služba Vlade - Odsjek za informatičku podršku,
- 1x „Službene novine Zeničko-dobojskog kantona“,
- 1x a/a.

